

आकाशवाणी

खबरां जगमोहन शर्मा कोला

पैहले खास-खास खबरां:-

1. प्रधानमंत्री नरेन्द्र मोदी होर अज्ज गुजरात ते महाराष्ट्र दे दौरे पर रौहडन। गुजरात च प्रधानमंत्री बड़ोदरा थमां 35 जहार करोड़ रपे थमां मती दी विकास परियोजनाएं दा उदघाटन ते नीह पत्थर रखडन।
2. रक्षामंत्री राजनाथ सिंह हुंदी अध्यक्षता च रक्षा खरीद परिषद ने त्रौने सशस्त्र बलें लेई इक लक्ख 10 जहार करोड़ दे रक्षा खरीद प्रस्तावें गी मंजूरी देई दिती ऐ।
3. लक्जमबर्ग दे उप-प्रधानमंत्री ते विदेशमंत्री जेवियर बेटेल होरें संयुक्त राष्ट्र सुरक्षा परिषद -UNSC च भारत दी स्थाई सीट दी मंग दा समर्थन कीता ऐ।
4. भारत ने अमरीका ते 24 होरनें मुख्यें कन्नै मिलिये अगली पीढ़ी दे 6-G नैटवर्क दे विकास गी सुरक्षित ते मकाबलेबाजी आहला बनाने लेई इक कुलसंसारी गठबंधन च शामिल होने दा फैसला लैता ऐ।
5. दिल्ली पुलसै सत्य निकेतन इलाके च 5 मंजला पी.जी इमारत दे ढेई जाने आहले मामले च इक्कै परोआर दे त्रै जनें गी गिरफ्तार करी लैता ऐ।
6. अहमदाबाद च विश्व तीरंदाजी पैरा सीरीज़ च अज्ज भारत सुन्ने दे तगमे दे मुकाबले च अपनी चुनौती पेश करोग।

<><><><><><>

ते हून खबरा विस्तार कन्नै:-



PM-Guj/ Maha Visit

प्रधानमंत्री नरेन्द्र मोदी होर अज्ज गुजरात ते महाराष्ट्र दे दौरे पर रौहडन। गुजरात च प्रधानमंत्री बड़ोदरा च 35 जहार करोड़ रपे थमां मती दी विकास परियोजनाएं दा उदघाटन ते नीह पत्थर रक्खडन। ओह पश्चिमी समर्पित माल दुआई गलियारें दे त्रै महत्वपूर्ण खंड मुख्य गी समर्पित करडन। एदे पर 20 जहार 7 सौ करोड़ रपे थमां बद्ध दी लागत आई ऐ। प्रधानमंत्री होर 9 जहार 7 सौ करोड़ रपे दी रेल-परियोजनाएं दा नीह पत्थर रक्खडन। महाराष्ट्र च प्रधानमंत्री होर Global Fintech Fest GFF-2026 दा उदघाटन करडन ते उस्सी सम्बोधित करडन। सम्मेलन च AI, क्वांटम तकनीक, डिजिटल भुगतान ते माली समावेशन जनेह विशें पर चर्चा होग।



DAC

रक्षामंत्री राजनाथ सिंह हुंदी अध्यक्षता च रक्षा खरीद परिषद ने त्रौने सशस्त्र बलें लेई इक लक्ख 10 जहार करोड़ दे रक्षा खरीद प्रस्तावें गी मंजूरी देई दिती ऐ। इस ऐतिहासिक सौदे दी सब्भनैं शा बड्डी विशेषता एह ऐ कि कुल खरीद दा लगभग 98 प्रतिशत हिस्सा भारतीय घरेलू उद्योगें थमां हासल कीता जाहग, जेहड़ा आत्मनिर्भर भारत अभियान गी होर मती मजबूती देग। त्रौने सेनाएं, जल, थल ते वायु सेना दे आधुनिकीकरण लेई इस पैकेज तैहत अज्जै-कल्लै दे किस्मै दे टोही विमान, ब्रिज सिस्टम, टैंक, हेलीकाप्टर, रडार, मरीन गैस टरबाइन, जैमर प्रणालियां ते जहाजें दी छमता बधाने सरबंधि तकनीकां ते उपकरण शामिल होडन।

<><><><><><>

Luxembourg Dy. PM

लक्ज़मबर्ग दे उप-प्रधानमंत्री ते विदेशमंत्री ज़ेवियर बेटेल होरें संयुक्त राष्ट्र सुरक्षा परिषद -UNSC च भारत दी स्थाई सीट दी मंग दा समर्थन कीता ऐ। उ'नें आखेआ जे मौजूदा वैश्विक बवस्था दी वास्तविकता गी दर्शाने लेई इस निकाय च सुधार लाज़मी ऐ। इक समाचार एजेंसी गी दिते गेदे इंटरव्यू च Bettel होरें आखेआ जे भारत दा आकार ते वैश्विक महत्ता विस्तारित सुरक्षा परिषद च एहदी शमूलियत गी महत्वपूर्ण बनांदे न। उ'नें आखेआ जे UNSC दा विस्तार उ'नें प्रमुख देशें गी शामिल करने लेई कीता जाई सकदा ऐ, जिंदी मौजूदा समें च कोई स्थाई भूमिका नैई ऐ, जिआं जे भारत ते ब्राजील।

<><><><><><>

Israeli Air Strikes

इज़रायल दे ब्हाई हमलें करी दक्खनी लेबनान दे इक गां च 12एं लोकें दी मौत होई गेई ऐ। Kfar Roummane च रातीं होए दे हमले च दंऊ बच्चें ते चार महिलाएं सनें 11एं जनें दी मौत होई गेई। इज़रायली सेना ने आखेआ ऐ जे उन्नै मुख्ये दे इक कब्जे आले इलाके च सैनिकें पर ड्रोन हमले दे परते च ईरान समर्थित थेहारबंद समूह हिजबुल्लाह दे बुनियादी ढांचे दे कन्नो-कन्नी किश आतंकवादियें गी बी नशाना बनाया ऐ।

<><><><><><>

Iran –BRICS Summit

ओंदे ब्रिक्स शिख सम्मेलन लेई ईरान दे राष्ट्रपति मसूद पेज़ेशकियान होरें नमीं दिल्ली यात्रा शा पैहले ईरान गी भारत दा इक महत्वपूर्ण राजनयिक केन्द्र दस्सेआ ऐ। उ'नें मेद बुज्झी ऐ जे एह समूह दपक्खियां बपार ते रणनीतिक सांझ-भ्याली गी निगगर बनाने लेई इक मजबूत मंच प्रदान करोग। इक प्रेस ब्रिफिंग दौरान ईरान दे विदेशमंत्रालय दे प्रवक्ता इस्माइल बाघेई होरें नमीं दिल्ली कन्ने लम्में चिरे सोआ चले आवा'रदे अपने सरबधें दे महत्व पर जोर दिता। 12-13 सितम्बर गी नमीं दिल्ली च होने आले ब्रिक्स शिखर सम्मेलन च राष्ट्रपति पेज़ेशकियान हुंदी भागीदारी गी दिक्खदे होई प्रवक्ता बाघेई होरें भरोसा दोआया जे बहुपक्खीय कूटनीति दपक्खियां सरबधें च तरक्की गी होर मजबूत करोग।



LG- Chicago Address

अमरीका दे शिकागो च कल जम्मू-कश्मीर केन्द्र शासत प्रदेश दे उपराज्यपाल मनोज सिन्हा होरें IIT BHU Global Alumni Meet गी सम्बोधित कीता। अपने सम्बोधन च सिन्हा होरें आखेआ जे Artificial Intelligence आर्थिक विकास गी मनुक्खी समर्थ ते मशीनी समझ राएं अगगे बदाग। उ'नें AI दा जिम्मेदारी कन्ने इस्तेमाल करने पर ज़ोर पाया। AI दा इस्तेमाल मनुक्खी समझ, जिम्मेदारी ते मानुएं दी दिक्ख-रिक्ख च सारे लोकें दी भलाई-बेहतरी लेई होना लोड़चदा। उ'नें नमें भारत दे उदय बारे गल्ल कीती जेड़ा घरै च मजबूत, दुनिया भरै च आत्म-विश्वास कन्ने खड़ौते दा ते मनुक्खता दे नमें भविक्ख गी आकार देने लेई पूरी चाली तयार ऐ।



India-US 24

भारत ने अमरीका ते 24 होरनें मुख्यें कन्नै मिलियै अगली पीढ़ी दे 6-जी नैटवर्क दे विकास गी सुरक्षित ते मकाबलेबाजी आहला बनाने लेई इक कुलसंसारी गठबंधन च शामिल होने दा फैसला लैता ऐ। एह महत्वपूर्ण घोषणा अमरीका दे मियामी च चलै करदी जी-20 दी नमिएं काहडें सरबन्धी मंत्री स्तरै दी बैठक दे दौरान कीती गई। इस बैठक दौरान भारत दे केन्द्री बपार ते उद्योग राज्य मंत्री जितिन प्रसाद होरें अमरीकी बपार मंत्री हॉवर्ड लुटनिक हुंदे कन्नै मलाटी कीती जेहदे परैन्त अमरीकी बपार विभाग ने एहदी अधिकारिक तौरा पर तस्दीक करी दिती ऐ। इस पैहल दा मकसद एह जकीनी बनाना ऐ कि औने आहला 6-जी नेटवर्क सब्भनें मिम्बर मुख्यें दे सांझे सुरक्षा हितें दे मुताबगक रवै। भारत, वैश्विक गठबंधन दा हिस्सा बनने दे कन्नो-कन्नी अपने घरेलू स्तरै पर बी भारत 6-जी मिशन पर तेजिया कन्नै कम्म करा'रदा ऐ- तां जे मुख्य तकनीक दे मामले च आत्मनिर्भर बनी सकै।



CM-IFFJK

जम्मू-कश्मीर च इनें दिनें अंतराष्ट्रीय फिल्मोत्सव दे चलदे शैल रौनक ते चैहल-पैहल दा म्हौल ऐ जेहदा उदघाटन कल

मुख्यमंत्री उमर अब्दुल्ला होरें श्रीनगर दे शेर-ए-कश्मीर अंतराष्ट्रीय कनवेंशन सेंटर थमां कीता। एह प्रदेश दे इस भेठा नमें ध्याय दी शुरुआत ऐ। 4-रोजा फिल्म महोत्सव च दुनिया भरै थमां फिल्म निर्माताएं, कलाकारें, प्रतिनिधिमंडल ते फिल्म प्रेमी हिस्सा

लै'रदे न। एह लोक 30 मुख्य थमां आए दे न ते इस उत्सव दौरान 130 फिल्मां दस्सियां जाडन। उदघाटनी समारोह गी सिनेमा दा जशम मनाने थमां कुते मता ऐ। मुखमंत्रि होरें आखेआ जे एह उत्सव जम्मू-कश्मीर गी फिल्म निर्माताएं लेई इक जीवंत ते बेहतर थाहर दे तौर पर दस्सने दा कम्म करोग।

<><><><><><>

DP-Arrests

दिल्ली पुलसै सत्य निकेतन इलाके च 5 मंजला पी.जी इमारत दे ढेई जाने आहले मामले च इक्कै परोआर दे त्रै जनें गी गिरफ्तार करी लैता ऐ। इस हादसे च 7 लोकें दी मौत होई गई ही जिंदे चा 5 विद्यार्थी हे ते केई होर लोक घायल होई गे हे। पुलस जांच च सामने आया ऐ कि एह इमारत कोई 50 साल कोला बी परानी ही ते कागजे-पतरें च एह इस्सै परोआर दे बक्ख-बक्ख जीएं दे नां ही। 81एं बरे दे हरिराम गुप्ता गी मुख आरोपी मन्नेआ गेआ ऐ, जेहदे नां पर बिजली दा कनैक्शन हा। ओहदी घरै आहली 75 बरे दी उर्मिला गुप्ता दे नां एह सम्पत्ति कनूनी तौरा पर दर्ज ही, जिसलै कि उन्दा पुतर 52एं बरे दा महेश गुप्ता इस पूरी इमारत च जागते लेई पेइंग गैस्ट सुविधा दा सारा कम्मकाज दिखदा हा। हरिराम ते ओहदी घरै आहली गी 14एं दिनें दी न्यायिक हिरासतै च भेजी दिता गेआ ऐ जिसलै कि महेश गुप्ता गी 2 दिनें च पुलस रमांड पर भेजेया गया ऐ।

<><><><><><>

Para Archery

अहमदाबाद च विश्व तीरंदाजी पैरा सीरीज़ च अज्ज भारत सुन्ने दे तगमे दे मुकाबले च अपनी चुनौती पेश करोग। महिला पैरा रिकर्व टीम फाइनल च भावना ते पूजा दा मुकाबला चीन कन्नै होग।

मर्दे दे पैरा रिकर्व टीम फाइनल च हरविंदर सिंह ते विजय सुंडी, स्लोवाकिया कन्नै खेड्डडन। पैरा कम्पाउंड मर्दे दी टीम फाइनल च श्याम सुंदर स्वामी ते तोमन कुमार दा मुकाबला इराक कन्नै होग। तोंआई मिक्सड टीम W-1 फाइनल च स्वाती चौधरी ते आदिल मोहम्मद नज़ीर अंसारी दी टक्कर चेकिया कन्नै होग।

<><><><><><>